



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 6 Yangia anidakangma : Tir Yimiyim

tiryimiyim@aolima

tir yimiyim

TAPAK 8

MLA Akhil Gogoi-i Guwahati nung section 144 agientsü akhanger

Elena Rybakina-i Italian Open kokogo



VOL. XX NO. 219 (ADOK 219) DIMAPUR TENTONÜ (MONDAY) MONUPII (MAY) 22, 2023 ₹ 5.00

## Manipur sorkar tamakok ajanga tensa mejungi aküm: CM Biren Singh

Imphal, May 21, 2023

(Agencies): May ita tetenzüklen Manipur nung tensa mejungi akümba aser mazüoktetba ya state sorkar indang tamakok ajanga liasü ta Manipur chief minister N Biren Singh-i Deobarnü ashi.

Manipur nung security maparen nung metokmeperi aser intelligence tsütsü tashimaitba ajanga lendong tulu atalok ta CM Biren-isa ashi.

"Iba atema sasaa bilemer aser temulung raksar" ta pai osangbener dang ashi.

"Onoki tebilemsü khuret abener. Iba ya onok tashimaitba ajanga liasü, security aser intelligence nung metokmeperi liasü" ta Biren-isa ashi.

"Nenok tsünga raratep masütsüla. Nisung kar dang tai tongloksütsü süra sorkar dak tongokjang. Onoki tebilemsü khuret abener" ta pai metetdaksü.

"Yimjung bener arutsü aser tensa süngjemsü atema inyaker. Kin o kin tsünga rara maliasü aser meraratsüla. Iba rara ya sorkar den lir, kechiyong sorkari kodang langka inyaksü merangdir, kari agizüker aser kari magizüker" ta Biren Singh-isa ashi.

"State balaka meshiba lisopur MLA 10 den Manipur sorkari jembitsü. Parnoka kibong nung dena lir. Asenok ajak adianutem dang lir" ta paisa ashi.

"Manipur nung kin balala tsünga yimjung aser adianu tangatetba nung alitsü ni mepishir" ta Manipur CM Biren-isa ayongzük.

May 3, 2023 nungi Manipur nung mepetmesü adoka raratepdang nisung 70 tema süogo aser meyirjang aika pei talidak toksür ogo.

Manipur nung tensa azüoktsü atema army aser paramilitary personnel 10,000 shi ka mapa lezmükja lir.

Külen, Manipur-i tang nungdakba chiyungtsü aser osettem bener aruba garitem asoshi special security cover inyakyim tenzükogo.

Army aser Assam Rifles den state sorkar, Manipur police aser central armed police forces külemi item garitem kümzüktsü atema mapa inyaker, ta Deobarnü defence spokesperson kati ashi.

NH 37 nung civilian garitem kümzükba ayutsü atema Army aser Assam Rifles indang Prophylactic Area Domination Patrols, Quick Reaction Teams, unmanned aerial vehicles o Cheetah helicopters ajanga aerial surveillance, CRPF o Manipur Police den India Reserve Battalion company temi nüka miter, ta defence spokesperson-isa metetdaksü.

Manipur Police aser CRPF indang Quick Reaction Teams-isa garitem meiner, ta paisa ashi.

## Advisor Hekani-i Union Minister aika den ajurutep

Dimapur, May 21, 2023 (TYO): Nagaland MLA aser Industries and Commerce Department Advisor Hekani Jakhali-i May 17 nü Union Minister of MSME Narayan Tatu Rane aser Union Minister of State MSME, Bhanu Pratap Singh Verma na den ajurutepogo.

Iba mapang parnoki Micro, Small & Medium Enterprises sector aser Nagaland renloksü indang onüktem benoka lemsatop. Advisor Hekani-i Nagaland nung MSME melenshitsu atema teinyaksü maparen aika agütsü.

Laisa Union Minister for Food Processing Industries (FPI), Pashupati Kumar Paras den senden amendang Nagaland nung food processing mapa inyaksü lenmang sadema aliba indang ashi.

Hekani-i Union Minister Paras dang Nagaland nung mapatong balala inyaksü asüngdangba melatsü atema ayongzük.

Ministry kübok mapatongtem inyaksü atema agüjang aser itemji agizüktsü ta Union Minister-i ashi.

Ministry kübok Mini-Food Park atema scheme tasen kar tenzüktsü anungji Nagaland-ia iba atema bilema liang ta paisa ashi.

Paisa taküm July ita Nagaland semdangtsü osang metetdaksü.

Advisor Hekani-i Union Minister for Development of

North Eastern Region (DoNER) G Kishan Reddy den-a ajurutep aser North Eastern Region o Nagaland nung teinyaksütem indang lemsatop.

Tenati Department aser Nagaland state indang Economic Road Map onüktem lemsatop.

Hekani-i Development Commissioner (Handloom & Handicrafts), Ministry of Textiles den ajurutepdang Nagaland nunga iba sector ajungkettsü atema yaritsü ayongzükba liasü.

Advisor Hekani-isa Ministry of Micro Small and Medium Enterprises, Textiles, Food Processing Industries, Invest India Team, Start-Up India Team, Department for Promotion of Industries and Internal Trade (DPIIT), DoNER semdang aser ministry balala nung Secretary tem den ajurutepa sensaksama liasü.

May 19, 2023 nü lai Union Minister of State for Entrepreneurship, Skill Development, Electronics & Technology, Rajeev Chandrasekhar den-a ajurutepa liasü.

Iba mapang Commissioner & Secretary to the Government of Nagaland Kekhrivor Kevichüsa, Director A Temjen Jamir aser Department of Industries & Commerce ketdangsurtemi Advisor Hekani Jakhali meina senzü.

## Karnataka nung Congress takok nungi asenoka angazüktsüla: NPCC tir



NPCC tir Wb. Supongmeren Jamir Bengaluru nung May 20 nü Karnataka Government tasen akümba sentong nung aden dang agiba noksa ka yangi angur.

Dimapur, May 21 (TYO): Karnataka nungertemi anung ajak tongdanga Congress takokba nisan aiyptsüsa agütsüba takokji telemsa adokdaksüba aser ochimashi yimsüsüba anema nübertemi anguba takok lir ta Nagaland Pradesh Congress Committee nung tir Wb. S. Supongmeren Jamiri metetdaksüogo.

Karnataka nung Congress telok nem nübertemi agütsüba takok nung ya asenok Nagaland nung alirtem asoshia tangazüktsü tajung lir ta paisa mepishia metetdaksü.

NPCC nungia tiri anir parnok ketdangpurtem Bengaluru nung Karanataka nung Congress teloki akümba government nung Chief

minister Siddaramaih aser Deputy Chief Minister DK Shivakumar nati anir kilonser ti yimten mapa agizükba tenangzükba agiba sentong nung oa dena liasü.

"Kodang tejangja nükla yur nübertemi mulungba nung odir, temelenshi arur. Iba ama temelenshi ka atema Karnataka nungertemi bendanga agüja inyakogo," ta NPCC tirisa ashi.

"Onok ya India nüchiso ngur külen linük longjemdakja tejakleni anir aoba yimten telok lir; onok telok ya timtem nunga yimten tangatetba nung matsüngshii nokdakba telok lir. Tang Karnataka nung anguba Congress takok ya India senso ajaki India yimten yimli tasen ka tenzükter ama bilema agütsüla," ta NPCC tir S.S. Jamirisa metetdaksü.

NPCC lenirisa Karnataka Chief Minister aser Deputy Chief minister na prongla nem tenüngsang tulu agütsü dang, "Nenoki anguba takok tulu yagi onoka nükjidong tuluba yur tali angazüktsü, temerangba inyaksü aser tajungba akümtsü ajungshir" ta metetdaksü.

## Rs 2,000 melentsü atema slip/form kecha menüngdaksü Opposition party temi BJP-i aniba Centre sorkar aitsür

New Delhi, May 21, 2023 (Agencies): Bank nungi requisition slip kecha memeshii dang Rs 2,000 notes melentetsü ta State Bank of India-i Deobarnü metetdaksüogo.

"Khen nung Rs 2,000 notes ya Rs 20,000 tashi ayutsü mesüra melentsü akok" ta SBI-isa shiogo.

Rs 2,000 notes melentsü indang sangoktsüba sülen social media nung form ka nung züluba sülen Aadhaar card amala kulikaket agütsür ang sen melentetsü ta osang tiyazü prokshiba ajanga SBI-i tanü iba inyakyim jangjashitsü.

Nisung kati khen nung Rs 20,000 melentetsü aser iba atema telatetba kecha mali. Anogo nung aiben melentsü akok saka bank nung tarensena (queue) noktaksüla, ta Centre sorkaria metetdaksüogo.

Külen, Reserve Bank of India (RBI)-i Rs 2,000 currency notes meyipa agütsü osang sangoktsüba opposition teloktemi aitsür.

"Centre sorkari ochimashi anendaksütsü atema demonetization asür ta 2016 nung lemtetba aitsür. Iba lemtet ajanga public timtemer" ta Aam Aadmi Party (AAP) national convenor aser Delhi chief minister Arvind Kejriwal-i metetdaksü.

"Iba yagi onoki PM ya tazünger ka asütsüla ta shijen ashir" ta Kejriwal-isa PM Modi luja ashi.

"Centre sorkari Rs 1,000 note tabanen amshitsu tenzük nunga süngmanga mebilemsü" ta Congress lenir aser taoba union finance minister P. Chidambaram-i ashi.

"Rs 2,000 note ya nübertemi sapua amshiba sen masü. Onoki November 2016 nung iba ya shiogo aser ibaji shitak ta tanü kuli angur. Nisungtemi kanga sapua amshiba Rs 500 aser Rs 1,000 notes demonetize asütsü tamashi telemtetba meyipangtsü atema Rs 2,000 note ya band-aid ka dang liasü" ta Chidambaram-i ashi.

Maneni, Trinamool Congress (TMC), Bahujan Samaj Party (BSP) aser Dravida Munnetra Kazhagam (DMK) teloktemia Centre sorkar aitsüogo.

"World market nung sen aser iba jenjang ya linük ka akhümden sendaktepa lir. Mapang shia sen melenshiba ajanga public timtemer. Iba jagi mapa meinyakdang jungjunga shisadangtsü nungdaker" ta BSP tanishir Mayawati-ia ashi.

"India sorkari Rs 2,000 notes meyipa agütsü lemtetba ya temenünüsüla aser meshisadangi inyakba mapa ka lir. Iba ajanga Narendra Modi-i pa ya Prime Minister inyaksü nübo ka masü ta sayuogo aser 2016 küm sangoktsüba demonetisation tamakok nguogo ta ashir" ta Telangana nungi Bharat Rashtra Samithi (BRS)-i metetdaksü.

"2016 küm Rs 2,000 indang currency notes adokdang iba nung nanochips keta lir aser ali nung arem nunga satellite ajanga putetsü akok aser black money kong miima lir shitetsü ta ashi" ta Congress lenir aser Chhattisgarh Chief Minister Bhupesh Baghel-ia metetdaksü.

"Rs 2,000 note ya black money samatsütsü atema adok saka black money mesama aser note ang agienogo. Kechiba iba sen meyipa agir ta RBI dang asüngdang. Iba tetezü nenoki küm tenet shia telemtetba melenshir. Iba ya nenoki jembizüka yokba meyipa agiba ama lir" ta Bhupesh Baghel-isa ashi.

"Nübertem anemba aser industrialist takartem yariba sorkar meibangtsü atema lendong aketba mapa inyaker" ta West Bengal Chief Minister aser TMC president Mamata Banerjee-ia ashi.

"Ano mebiledmangi Rs 2,000 notes meyipa agiba ajanga kecha masüba nübertem timtemdaksütsü" ta lai ashi.

Maneni, Trinamool Congress MP Mahua Moitra, Communist Party of India (Marxist) tanishir Sitaram Yechury aser DMK president & Tamil Nadu Chief Minister M.K. Stalin nungeri sorkar aitsüogo.

"BJP-i Karnataka assembly election nung tamakok tulu anguba mii bangtsü atema iba mapa tenzükter" ta M.K. Stalin-ia ashi.



Wb.Sentilong Ozükümi züluba yimdangjem otsü " The Case of Longti Village" kaket nungi agiteta jilushi sayuba aser angazükba sentong ka anogo 30 nü tashi agir külen tesüsa Maple Tress School, Dimapur nung iba kasa otsüji tanurtemi ia sayuba ajanga tereprangertema Longti yimtak alirtem den külemi amonger ama bilema jangratema repranga liasü. Iba sentong ya National School of Drama, New Delhi aser Hill Theatre Nagaland nati achaayanga liasü aser jilushi maparen nung züngtetba mongin tesayur Wb.Bendang Wallingi tongti shilem agia liasü. Pa den yaritepa iba jilushi yanglurtemji London School of Performing Arts nung züngtetba Victor Singh aser NSD, New Delhi nung züngtetba Uto Chishi aser Kilangtemsü Imsong nungertem liasü. Iba sentong ya Limasenla Jamiri len ani aser Alobo Naga-i lapoktsü.

### Sen 2000 notes melentsü atema ID menüngdak: SBI

**New Delhi, Monupii/May 21 (Agencies):** State Bank of India (SBI) indang branch nung sen 2000 notes melentsü atema form mesüra identity proof kecha menüngdak, ta SBI ajanga metetdaksü. "Temelaba kecha makai nüburtemi khen nung sen 20,000 indang sen 2000 note melentsü asoshi melar," ta SBI ajanga ashi. Sen melentepba mapang sen meleneri identity proof agütsütsü menüngdak, ta ashi. Hokulbarnü (May 19, 2023) Reserve Bank of India (RBI) ajanga sen 2000 notes tem mamshitsü sangdonga liasü. Ajisüaka sen 2000 notes ya maneni amshitsü akok. RBI ajanga bank dang tang nungi tenzüka sen 2000 notes agütsüba anentsü shia liasü.

"Sen 2000 notes tem circulation nungi agientsü telemtetba agiogo," ta RBI ajanga sangdong ka nung ashi. Nüburtemi sen 2000 denomination notes tem September 30, 2023 tashinung melentetsü, ta ashi. "Nüburtemi transaction atema sen 2000 banknotes maneni amshitetsü aser payment nunga agitetsü. Ajisüaka item notes ya September 30, 2023 tashinung deposit asütsü aser/mesüra melentsü ajungshir," ta RBI ajanga sangdong. March 2017 matongdang sen 2000 denomination banknotes tem shilem 89 shi agütsr liasü aser itemya arishi küm 4-5 shi lir ta asadangteta lir, ta RBI-i ashi. Linük nung March 31, 2018 tashinung item banknotes

amshiba ya timba agi sen lakh crore 6.73 (37.3% of notes in circulation) aliba nungi tang March 31, 2023 tashinung sen lakh crore 3.62 (shilem 10) alitsü, ta ashi. "Transactions atema iba denomination ya kanga bulua mamshir ta ajiteta arur. Nüburtem peria danga denomination nung banknotes yua lir," ta RBI sangdong ajanga ashi. Danga denominations nung banknotes tem peria mangu tashi amshitsü atema sen 2000 banknotes ya benok. Bank branch tem akhi ama mapa inyaksangshi nung timtem majurutsü aser tayongba nung inyaksü mechi May 23, 2023 nü nungi tenzüka sen 2000 banknotes ya sen 20,000 tashi melentetsü.

### Diphupar 'B' nung alitsü arur Aor ajak tenüng zülüoktsüla

**Dimapur, Monupii/May 21 (TYO):** Diphupar 'B' Ao Community indang pangzüng 8 nung shia aliba ama, Diphupar 'B' village telungzüik nung nisung tasen arua aliba Aor temi iba sangdong agütsür ita asem tsüngta Union nem osang agüja tenüng zülüoktsüla, ta sangdong ka

ajanga ashi. Tenüng mezülüoki alirtem tia maka timtem kar danga ajurura Union khuret masütsü. Iba dak sendakba nung metetpelatsü aser osang agiteptsü asoshi mobile number 8415002960/7005320144 nung tongteprateptsü akok, ta sangdong ajanga ashi.

### Naga nunger kaketshirtemi Guwahati mürekba sentong agi

**Guwahati, Monupii/May 21 (Agencies):** Guwahati Eastern Nagaland Students' Union (GENSU) ajanga Honibarnü Nagaland House, Guwahati nung anogo ka social work inyaka liasü. Nagaland House den lungjemer iba mürekmejuba sentong ya inyaka, ta GENSU ajanga metetdaksü. Iba sentong nung shilem ka ama kaketshir temi Guwahati nung aliba Nagaland House temeket müreka jana bendena liasü. Iba sentong nung GENSU züngsemtem, Nagaland House

nungi Deputy Resident Commissioner, Ilika Zhimomi-i anir staff tem aser Naga Students' Union Guwahati (NSUG) ketdangpurtem dena liasü. GENSU küm shia pangzüng renemba nung ajemdaker iba mapa ya inyaka liasü aser iba ama sentong ya küm shia inyaksü, ta ashi. Iba ama sentong yagi kaketshirtem metettepba den külemi pei temeket müreka ayutsü tangatetba lidaktsür, ta sangdong ajanga ashi.

### Assam Rifles temi Manipur nung medical teyari agütsü


**Kohima, Monupii/May 21 (TYO):** Assam Rifles temi anir Kuki-Meitei telungjem senden ka Kwatha nung May 15, 2023 nü amenba ajanga yimdaklir nem tongtipang mozü agütsütsü lenmang lapoka liasü. Iba sentong ya ajanga kin balala nungi züngsemtem aser lokti tentet balala tsüngta yimdaklir ajungtsü asoshi jembishinüa liasü.

Iba senden nung Assam Rifles nungi ketdangsür temi yimdaklir aser yimtsüng nung lenirtem den sensaksem aka aser iba mapang nisung 320 shi temang nung timtem balala aliba jangjateta liasü. Ajisüaka tang mepetmesü aser curfew tenokdangba aliba ajanga medical teyari bushitsü tamakoktsü akum. Anungji yimdaklirtemi item

timtem ajuruba ajiteta Assam Rifles medical ketdangsür temi yimtsüng telungzüik nung medical camp ka ayongzüka liasü. Iba mapang parnoki kanga junga asadanga yimdaklirtem temang mejungi alir ita ka atema mozü bener arua lemtsü. Assam Rifles temi iba ama mapa tajung inyakba atema nüburtemi pelaba lemsatetpa liasü.

### Guwahati nung CrPC indang Section 144 benoker

**Guwahati, Monupii/May 21 (Agencies):** Mepaidoktetba tensa ajanga tesunep aser yimjung raksatsüsa tia majurudaktsütsü nükjidong nung District Commissionerate of Police, Guwahati ajanga Police Commissionerate indang jurisdiction aser temeket nung Section 144 benokogo. Office of the Commissioner of Police Guwahati, Assam ajanga sangdong ka nung ashiba agi, "Mejangjaba nisung mesüra telok mesüra tentet kari Police Commissionerate, Guwahati indang jurisdiction kübok offices, nüburtem senzüsempingba aser gari oli-oraba nung tetsükdaktsü agütsütsü amai ajiteter aser iba amala nisung telok mesüra organizations/associations temi Police Commissionerate, Guwahati kübok tesem mashi nung longkak aittsü mesüra yimyim ayima jajatsü amai asadangteter aser itemji ajanga tesunep aser public order nung timtem ajurutsü aser shia aliba



tesemtem nung nüburtem aser gari senzüsemping nung timtem ajurutsü akok aser offices tem inyakyim nung timtem ajurutsü aser nüburtem inyaksangshi nung tetsükdaktsü ajurutsü amai ajiteter." Anungji nüburtem kumzüka ayutsü mechi aser office tem maparen shidak inyaksü asoshi shia aliba tesem nung Section 144 kübok tenokdangba benoker, ta metetdaksü. Iba tenokdangba kübok nisung pongu dak tema adenshiba aser processions aoba aser yimtim ayima jajaba nokdang. Iba tenokdangba ya Police Commissionerate, Guwahati ajanga nung alitsü

### Kuki MLA temi akhangba nung Mizoram BJP dena lir

**Aizawl, Monupii/May 21 (Agencies):** Mizoram BJP indang state executive meeting ka amenba mapang azüdokshi agi kongshia aliba Manipur state nung Kuki nunger MLA 10-i administration balaka meshiba ya tim lir ta ajiteta liasü. "MLA 10-i administration balaka meshiba ya tim ta onoki angateter, kechiaser Manipur nung parnok takum lendong nung lir," ta Brehostibarnü party ketdangsür temi lemtetba pangzüng nung shia lir. Manipur nung kin balala tsüngta raraba mapang Zo nungi jakzüker dak tashiyim amshiba aitsür, ta parnokisa ashi. "Manipur sorkar aser item mapa inyaker onoki khukhua aitsür. Azüdokshi agi timtemer asoshi onoki aria bilemtsür aser talitsü ki, tekülem ki aser osettsüset raksatsür alir nem Manipur sorkari teyari

agütsütsü akhanger," ta BJP state unit ajanga ashi. BJP Mizoram tir Vanlalthmauaka-i osangbener dang ashiba agi, "Tang aliba sorkar kübok parnok kumzüka mali. Parnok kumzüka ayutsü asoshi state sorkari tapet mera agitsüla. Parnoki administration balaka akhangba ya tim lir." May 12 nü BJP nungi par tenet densema Kuki nunger MLA 10-i Centre dang Chin-Kuki-Mizo-Zomi-Hmar kin asoshi administration balaka meshia liasü. Nütsüng timba aliba Meitei kini azüdokshi mapa ya inyak aser BJP-i aniba state sorkari yari, ta MLA temi tai tongloksü. "Manipur nung menokdangteti May 3, 2023 nü azüdokshi tenzüka mapa ya majority Meitei nungeri inyak aser tang aliba Manipur sorkari Chin-Kuki-Mizo-Zorni hill tribal anema inyaka, anungji

state sadanger aliba mapang ano tali telemsa adokdaksü," ta MLA temi lungjemer sangdongba nung ashi. Kasa mapang Government of India den yimjung ken o jembidang Zo ki lungjemdaktsütsü indanga shiogo, ta Mizoram Chief Minister Zoramthanga-i Hokulbarnü shia liasü. MNF General headquarters nung senden amendang, "Danga state tem nung Mizo nunger aliba tesemtem atema administrative unit ka kumtettsü atema MNF delegation temi süok. India sorkar tenüng nung parnok dang constitution indang Article 3 tuteta ashi, kong iba atema inyakyim shia lir saka sorkari iba atema kecha meshitet," ta CM-i shia liasü. Ajisüaka Manipur sasep nung Mizoram sorkari teka amoshitsü makok, ta paisa ashi.

# PM Modi-i Peace Memorial Park nung asürtem nem akhüm agütsü



May 21, 2023 nü Hiroshima nung Group of Seven (G7) linüktem senden aliba mapang Japan Ato kilonser, Fumio Kishida den India Ato kilonser Narendra Modi densema tejaoker linüktem nungi lenirtemi Peace Memorial Park nung Atomic Bomb lendong nung asürtem nem akhüm agütsüba noksa nung angur.

**Hiroshima, Monupii/May 21 (Agencies):** Amongnü Japan kübok Hiroshima yimti nung aliba Hiroshima Peace Memorial Park nung India Ato kilonser, Narendra Modi-i World War II mapang atomic bomb lendong nung asürtem nem akhüm agütsügo.

Ato kilonser Modi dak alia Hiroshima nung G7 senden nung adener lenirtemia kasa Park nung asürtem nem akhüm agütsü.

Modi-i memorial site nung akhüm agütsüba noksa lemsatepa Ministry of External Affairs otongdar, Arindam Bagchi-i, "Hiroshima nung asürtem nem akhüm agütsü. Ato kilonser Narendra Modi-i anogo tenzüka Peace Memorial Museum semdang aser tesemdangertem kaket nung sign asü," ta metetdaksü.

Paisa G7 lenirtem senden nung adenba noksa ka lemsatepa, "Lenirtemia

Hiroshima Peace Memorial Park nung asürtem nem akhüm agütsü," ta metetdaksü.

G7 senden nung adentsü atema Japan Ato kilonser Modi jaoka liasü.

G7 senden ya May 19 nungi May 21 tashi agiogo aser iba senden nung Modi-ia chiyungtsü security aser energy security densema tongtibang onük aika jembli.

Amongnüsa Modi Hiroshima nungi Papua New Guinea-i ogo. May 22 nü Papua New Guinea Ato kilonser, James Marape tena lenisüba nung 3buba Forum for India-Pacific Islands Cooperation (FIPIC) senden amentsü.

2014 küm Modi-i Fiji semdangba mapang nung FIPIC tenteta liasü. Iba senden nung linük 14 nungi lenirtemi shilem agütsü. PIC züngsem linüktemji Cook Islands, Fiji, Kiribati, Republic of Marshall Islands, Micronesia, Nauru, Niue, Palau, Papua New Guinea, Samoa, Solomon Islands, Tonga, Tuvalu aser Vanuatu lir.

Ato kilonser Modi-isa Tir Marape aser Papua New Guinea Governor General, Bob Dadae na den senden amentsü tebilemba lir.

# HP aser Karnataka nung takok anguba sülen Cong-i MP nung rangoker

**Bhopal, May 21 (Agencies):** Tawa BJP-i Himachal Pradesh aser Karnataka assembly elections nung tamakok anguba ajanga Congress teimla tera kaogo aser tang Congress-i Madhya Pradesh assembly election nung rangloker maparen tenzüko.

Yaküm Congress lenir Rahul Gandhi-i "Bharat Jodo Yatra" sentong kübok state 14 aser kilometer 3,800 ayimjemba sülen party-i state assembly elections ana nung takok nguogo.

Hindi jembiba state ana Chhattisgarh aser Rajasthan na nung tang Congress sorkar lir aser Madhya Pradesh nung ang BJP sorkar lir.

Madhya Pradesh nung yimtenren mongintemi ashiba agi, Karnataka election nung Congress-i takok nguaka Lok Sabha elections nungbo takok mangutsüa akok, ajisüaka sangküm Lok Sabha election atema Congress-i jenjang junga amenokogo.

Taküm küm tatembanglen Madhya Pradesh nung agütsü aliba assembly elections nung ruling BJP dang nungibo Congress jenjang tajungba lir ama bilemer,

mongintemi metetdaksü. Osangbenertem den jembidang Madhya Pradesh Congress Tir aser taoba chief minister, Kamal Nath-i, party-i majority ngua sorkar akümtsü aser state nung Lok Sabha menden-a teimbaka nung takok angutsü, ta metetdaksü.

Kamal Nath-i, "Tang onoki ita ishika tsüngda agütsü aliba assembly elections nung rangloker. Madhya Pradesh nung aliba nüburtemi BJP sorkar ochimashi agi laktetogo. 2024 küm Lok Sabha election nung Congress-i menden kwi nung takok angutsüar ni masadangteter, ajisüaka onoki menden tiembaka nung takok angutsü," ta metetdaksü.

2019 küm Madhya Pradesh nung Congress sorkar liaka Lok Sabha election nung Madhya Pradesh nung Lok Sabha menden 29 nungi BJP-i menden 28 nung takok ngua liasü saka Congress-ibo menden ka nung dang takok ngua liasü.

Tawa Karnataka assembly election nung Congress-i menden 224 nungi menden 135 tashi nung takok ngua sorkar tentetogo.

Yaküm November 12 nü assembly menden 68 aliba Himachal Pradesh nung agiba assembly elections nung Shivraj Singh Congress-i menden 40 nung takok ngua liasü; BJP-i menden sorkar agi 25 aser tangartemi menden laktetogo, ta asem nung takok ngua liasü.

# Srinagar nung G20 senden jakdang arrtsülen security akangshiogo

**Rajouri, May 21 (Agencies):** Jammu & Kashmir kübok Srinagar yimti nung G20 senden jakdang Border Security Force (BSF)-i International Border nung security akangshiogo.

Hombar nungi Bodhbar tashi Srinagar nung G20 senden amentsü.

BSF indang special water wing-i Chenab ayong nung rong amshia patrolling tenzüko, ta Amongnü BSF ketdangser kati metetdaksü.

"Item rong ya Chenab ayong nung tzü tashi tizüktetsüsa yanglu; sepaitemi rong nung mener ayong nungi arrtsülen anüksü," ta

ketdangserisa metetdaksü.

Osangbener den jembidang sepai kati, "Anüngdang-aonung shia onoki rong nung mener patrolling senzü tenzüko, tetsüng agi aser gari nunga patrolling senzür. Onok ya linük asoshi lir, anungji onoki ajak inyaksü," ta metetdaksü.

Arrtsülen dang masü saka Jammu & Kashmir tesem ajaklen security tashi itshiogo aser Rajouri nung Jammu & Kashmir police-i gari ajak mita repranger.

Additional Director General of Police (ADGP) Kashmir Zone, Vijay Kumar-i, Union Territory nung

G20 senden atema lenla aisü nung security renemogo, ta metetdaksü.

Paisa, "Iba sentong atema security shilem asem alitsü. Anti-drone equipment renemogo. Onoki security atema NSG aser Army teyari agir. Dal awatsüng nung security atema onoki MARCOS team ka lezmüksügo aser Police team-a ka alitsü," ta metetdaksü.

India Tir kübok 3buba G20 Tourism Working Group senden Jammu & Kashmir yimtiba, Srinagar nung aliba Sheri Kashmir International Conference Centre (SKICC) nung agütsü. Iba Centre ya Dal awatsüng tzüküm anasa lir.



May 21, 2023 nü New Delhi nung Delhi Chief Minister Arvind Kejriwal aser Bihar Chief Minister, Nitish Kumar nati osangbenertem den jembidang tangokba noksa nung angur. Kasa noksa nung Bihar Dy CM Tejashwi Yadav aser AAP MP Sanjay Singh nata angur.

**Form No.3**  
 [See Regulation-15(1)(a)/16(3)]  
**DEBTS RECOVERY TRIBUNAL GUWAHATI**  
 Suwarna Bhawan, House No.12, New Town Path, Near Hanuman Mandir, G.S. Road, Ulubari, Guwahati-781007 (Assam)  
 Case No.: OA/27/2023  
 Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993. Exh. No.: 3236

STATE BANK OF INDIA  
 -VS.-  
 MESSERS V GENERAL SHOP

To,  
 (1) MESSERS V GENERAL SHOP  
 PROPRIETOR Y VITO YEPTHOMI SON OF YETOSHE YEPTHOMI 4TH MILE, OPPOSITE CENTRAL JAIL DIMAPUR NAGALAND PIN 797112 Dimapur, NAGALAND-797112  
 (2) Y VITO YEPTHOMI  
 SON OF YETOSHE YEPTHOMI PROP OF MESSERS V GENERAL SHOP HOUSE NO 52 VIYITO VILLAGE NIULAND TOWN DIMAPUR NAGALAND PIN 797112  
 (3) Y VIHOTO YEPTHO  
 SON OF YETOZE YEPTHO VIYITO VILLAGE NIULAND DIMAPUR NAGALAND PIN 797112 DIMAPUR, NAGALAND - 797112

**JAOKER**  
 11.05.2023 anogo nung Hon'ble Presiding Officer/Registrar matsüngdang OA/27/2023 benoka liasü.  
**Rs.3595573.85/-** sentsüh atema iba Act kübok section 19(4) application nung ajemdaker na anema (OA) benoka Hon'ble Tribunal-i jaoker/ notice agütsür (application den documents copies densema lir).  
 Iba Act nung section 19 kübok sub-section (4) nug ajemdaker defendants dang teküboklen aliba tetuyuba agütsür:-  
 (i) Iba case defende asürtemi tajaba agütsüba sülen anogo semer nü tsüngda relief asoshi mepishibaji kechiba magütsüsüla, iba kuliji sayutsü metetdaksü;  
 (ii) Original application nung serial number 3A kübok applicant-i shia aliba kiojen aser assets dak alia tanga kiojen aser assets sangdongtsüla;  
 (iii) Original application nung serial number 3A kübok shia aliba kiojen aser assets ayoktsü mesüra item kiojen atema inyaksangshitsü memelar;  
 (iv) Security interest atema inyaksangshiba dak alaka Tribunal dang nungi jelia temelaba magii original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyaksangshi masütsüla;  
 (v) Ordinary business ajanga secured assets mesüra tanga assets aser kiojen nungi yokzüka senji security interest soita aliba bank mesüra financial institutions indang account nung deposit asütsüla.

Nü dang tezüluba nung sangdong applicant nem agütsüsü tuyur aser **08.06.2023 anogo nung anepdang 10:30 ako nung Registrar matsüngdangi arutsü tuyur, yamaji meinyakra application ji angadangtsü aser na meliaka telemtetba agütsü.**  
**12.05.2023 anogo nung tsünglanglen kü meyongnem den iba Tribunal indang seal agütsür:**

Registrar,  
 Debts Recovery Tribunal, Guwahati.



## TIR YIMYIM YIMOBILEM (EDITORIAL)

DIMAPUR TENTONÜ, MONUPII (MAY) 22, 2023

### Ozü yimti temerük !

**L**inük nung urban tesemtem nung tan ita nungi tenzüka yimti merükba sentong ka tenzüker. Iba sentong asoshi yimyim ka " Kü taküm aser özü yimti temerük" ta agüja lir. Iba yimti temerükba sentong nung inyaksüba mapatemji English zülumen R agi tenzüka ojang asem " Reduce, Recycle, Reuse – Ajema kümdaktsüba, Tanaben yangluba aser Tanaben amshiba" ta shimteta lir. Atangji, iba ama sentong yabo Urban tesemtem nung dang masü saka yimtak yimtsüngtem nunga külemi tenzüknütsüka, ajisüaka ibai Housing & Urban Affairs Ministry ajanga apiteta ayongzükba asünungji tangbo 'rural' tesemtembo mamsemer. Ajisüaka, government-isa mayongzükya asenoksasa asen alidak town aser yimtsüng nung dang masü saka awatsüng aser ayongtem dena merüka ayutsüba sentong tenzüka inyaksü imlar. Iba ama sentong ya sentongbo government sentong saka teinyaksü mapabo nübortem asütsü. Atangji, asenoki janaba janaona indang jembir asünungji, kilong nunga aser kima nunga asenoki kobateka janar patekaji aoktsü aser merüksü atema asaktsü aser melatsübaji keta lir. Janaonasa süaka asen lima nung küm 30 jakdang janaba janaona o tanü asüng janaba janaona na kenyongi balala. Akhidang janaba janaonabo tanaben melamelaa ali kuma aotsüba osettem am, süngolemba aser kaketterem dang liasü, anungji kima yimdong memerüki liaka alima nung taküm alirtem asoshi lendongbo mali asü. Ajisüaka, tanü putu nung asenoki janaba janaonatem yabo amzü –amsang, süngolemba aser kaketterem dang nungibo plastic aser merang osettem teimba lir. Iba nungi adokba tebilemstüji merangjibo küm ishika nung ali kuma aotsü saka plastic yabo ali kuma aotsü atema küm noklang aika agir. Aji oda, plastic agi shishilemdak yangku kümer amshiba polythene bag, tajemtsü tzü zür ayokba plastic pongdang aser asenok nungdak atema plastic agi yanglutsüba kechisarina osettem ajak ya asen keti arur küm aikabo masü, anungji asenoki polythene bag nung osettsüset benshibenra melaba aser plastic oset jenjang tezüba agi anguba apir zübazübaa alir aser amshir dang ashi, asenoki item plastic osettem amshir endokba nungi alima nung taküm alirtem, shiruru, ozüsangnu aser süngdonglidongtem dena, timtem takoksa ajurutsübaji asenoki memetet aser yimdangia marur, iba jagi asenoki asenok amshir menügdakba plastic osettem mashimashi nung endoker. Asenok shiba südir sang, tang ya asen alidak temeket nung reprangdanga ao nung, temetet, plastic tejentera agi süng angutsü. Ano tamajungbaji, asen anasa aliba ayong reprangdanga odangra ayong tasüng plastic agi sünger ali telongi tzüa yimpoka meitet atsüngdena angutsü. Ibaji dang masü saka asen alidak kilentzü tasüng plastic agi motzua yimpoka moulutettsüba nangdena angutsü. Item jagi motzü lendi nung yimdaktsür aser ayong nokdanga yur tzümetsüng adokdaktsür. Aji dang masü plastic agi ali tema, telong aser tzü nung aliba taküm shirurutema ajak taküm melitettsüba nokdanga ayur. Aji oda, plastic agi ali telonga asüng nungji ali temai süngdonglidong meyteta madoker. Item ajakji asenoki kenü polythene bag tejen ka endokba nungi mesüra chiyongtsü langka shipoka chir tasepba plastic mashi nung endokba, tzü jemer plastic pongdang mashi nung endokba aser plastic agi yangluba osettem bendena bener oa mashi tesem ka nung endokba mapatem nungi ataloker. Item timtem takoksaji nokdangtsü atema tang ama yimti merükba sentong ya ayongzuka agir. Atangji, tanü lima ya plastic lima kümer asünungji plastic agi yangluba medeniang asenok taküm lia moutettsü amai kümogo, anungji plastic agi yangluba osettemji tamshitsüba. Ajisüaka, asenoki meteta benshitsüba mapatemji akok tashi plastic agi yangluba osettem ajema amshitsüla aser akok tashi khen dang masü saka aiben amshitsü merangtsüla. Aji oda, shi ango aser aonsutsütem alia bener aruba polythene bag-tema meshipok tashi shidokli amshili ta aiben amshiba jagi asen taküm kümzüker ta asenoki metetdi. Kasaji, mamshitettsüla plastic agi yangluba osettemji meindoki ano tanaben oset tasen yanglua amshirtem nem agütsüra, iba jagi alima nung taküm alirtemsa ajangzüksü. Tanü putu nungbo asenok alidak merüka alitsüba mapa ya topur ajangtsü atema dang masü saka asen taküm aser alima kümzüksü asoshi lir.

## OLEMSABANG NAGALAND TENÜNG DEN PETA YANGERTSÜLA

- J. Opang, Dimapur

Tsüngremi yangluba kechiserana ajak temelenshitsü mali kanga junger, saka item rongnung nisung meimchir ya tamajungtiba aser temelenshitsü kanga lir. Aser alima nung aliba nisung meimchir rongnung asen Naga nung ya tamajungba, ano item rongnung asen Aor tamajungba amai bilemer. Ashiko Yisu yimsu ya maru asübo asen Naga nung yabo leptepa sümar asen Naga lima ya kiyonger tem yagi atsübanger lilana tasa bilemer.

Asenok Naga nung rongnunga dangar kinbo, kin (tribe) kati kin ka anema dang rara, saka asen Aorbo asen o asen na, adianu o adianu na leptep. Ya danga kecha agia masü, saka konang bushitepdang, tulu shisangnüdang yamaji inyaktep südi ta bilemer.

Asen lima nüjiso atema raradanga asen Aor rongnungi CID adoka pei nübur tai makaba takum tajung aika laluba asen nüburi anir asen lima nübur reshikangshiba, item indang bilemdang nüktzü ayimba manener.

Tsüngrem sa shisa takatibajito, Naga nung nem ya nüjiso agütsüra, tekolak agi raktepdang parnok o parnok na leptepa civil-war ang alima matem tashi alitsü ta ajitet yong, Tsüngrem jagi alima nung yimsüsür molungjang nungji jembia nüjiso ya magütsüdaktsütsü südi ta apiteter. Ashi kodang otsütemji asadangdir, nüjiso agütsütsüa anasa arur, asenok Naga nung agi tebu makum ajanga mongutetba otsütem angur. Au India nung tulurtem aikati Naga-land ta inoksema nungja magütsünüi England, Thailand, Scotland, Switzerland tem den medemdangtsü makok aser 'land' ta inoksema tenüng ajatsü malang ta jembiba lir. Saka tamalen asen Naga nung nüjiso bushirtemi kanga shisa kaa tulurtem den jembir Mongsenyimti nung sentepa mungdang nung NAGALAND ta tenüng tajung ya jatsüba angashi.

Süra asenok Naga nung rongnungi shibai apiteta Nagaland ta tenüng ya jatetar bushidanga tenüngsang agütsütsü tetemsü. Anungji Nagaland-ji tenüng tajung, dangar foreigner temi tenüngji dang angara yangji aliba nüburtemji kanga tajung alitsü ama bilema arur aser alimaji Switzerland amaji tebour junga yangerteter alitsü ama nüklai arua semdangar. Asenok tsürabortemi tanur tila asüdang kanga shirangra tenüng matir ta sür tenüng melenja aru. Tako-taya agi melentsü, ajisür shirang anena junga akumba aika lir. Yamaji asen Naga nung yaa tenüng matir amai ajitet. Tenüng ya tako-taya kar agi melener lenirtem ya dena melen nungang jungdisü ta ajitet. Kechiyong Nagaland ya kanga yaretba tia nung lir. Centre nungi yokba ama development kecha shidak maor. Tatishtsü agi, danga state tem nung two-lane mesüra four-lane dang nungi Nagaland nung aliba two-lane mesüra four-lane kanga tilaba angur. Danga lima nungbo guarantee lir aser aji matem dang bill ajakbo magütsür aser raksara yanglushidaktsür. Asen lima nungbo yamaji masü.

Industrial revolution sülen alima kanga keraa ainba asenok tenük agi angur aser meteter. Saka asen Naga nung zü nung industry mepoksem. Kechi agi alima ainer aji memetet. Au, anünglak tonga longki atongtepa süa yur yangnungjagi aruba para jia mejanga kazüa meinyaki chiyonga alitsüba lima chirnurtem nem yanglutsüba lir. Saka takar temibo farm/factory kar lapokra yangji ner kinunger mesüra ner yimerbo employ sütettsü nung koda.

Ariena Tizit nung fly-wood factory alinung samadaktsü, tali ang bendenloka aotsü melena. Tuli Paper Mill samadaktsüba aser yangji mapa inyaktertem koma timtemseter aser aji Nagaland government-i mangur. Parnokja asenok ama nisung dang asenoki achiba ama achir, ajemer, sübur, shilur, jenokdak nungdaker aser parnoka chirnur nem education agütsür. Parnok nüktzü laluba amajok masütsüakoti! Külen Dimapur Sugar Mill samadaktsü. Item melena Nagaland nung kechi industry sa ali. Employment tebilemstüji industry lapokba ajanga dang akoktsü.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir**

Liangmai Theological Association 31buba lokti mongdang tembangogo




May 21, 2023 nü LBA Mission Center, Tening nung 31buba Liangmai Theological Association mongdang nung shilem agirtem tangokba noksa nung angur.

**Dimapur, May 21 (TYO):** 31buba Liangmai Theological Association mongdang May 20-21 anogotem nung Mission Center Tening nung ayongzüka agiba sülen Amongnü tembangogo, ta Rutmakbo Media Cell LTA (N) sangdong ajanga metetdaksü. Iba sentong ya LTA Tir, Kr. Khiupumme leniba nung

ayongzüka liasü. Senden nung parnokisa Association kübok aliba Arogotem tashi itshitsü atema Khristantem atema tongtibang anogotem dak sendakba kaket ka adoktsü telemtetba agi. Senden nung youth pastor, Kr. Kungkam Newmai-i 'The role of Women in the

Christian Ministry' onük nung paper presentation agütsü. Kadidinbo leniba nung Filemon kaket nungi Bible study agia liasü. LBA züngsemtemisa Arogo trok semdanga tamangertem tsüngda fellowship tashi itshitsü aser Arogotem tamang jenjang aintsü ajungshia liasü.

Presbyterian Arogo nung pastor, Harry Reeder gari lendong nung asü



Pastor Harry Reeder

**May 21, 2023:** America nung Presbyterian Arogotem tulutiba rongnung ka- Briarwood Presbyterian Arogo nung senior pastor ka gari lendong nung süogo. Birmingham, Alabama nung aliba Briarwood Presbyterian Arogo nung tongti pastor arrshi küm 75, Rev. Harry Reeder III Brihostibarnep (May 19, 2023) pa meyong gari aser dumper truck ka na tsüktepba lendong nung asü. Briarwood Arogo nungsa Pastor, Bruce Stallings-i Arogo indang page ajanga Rev. Harry Reeder asüba osang sangdonga liasü. Pastor Bruce-i, "Asen Kibubai gari lendong ka ajanga Pastor Reeder jar ogo. Onoki

mangyimba mapang nung yimlibilema Cindy, Jennifer, Ike, Abby aser tanünga kibong züngsemtem den Arogo nung staff tem aser züngsemtem atema sarasademjang," ta lemsatsep. "Ajisüaka asenoki teimla makai mangyimer masü, kechiyong asen pastor Pa kümzüksang den lir aser Kibubai pa dang 'Nai junga inyakogo, Kü tenzüker tajung' ta shia pelaa agizüker asütsü ta asenoki meteta lir," ta paisa metetdaksü. Rev. Reeder asüba osang angashiba sülen lenirtem aikati social media ajanga mangyim jashi lemsatsep. Briarwood Arogo nung adener Republican, Gary

Palmer-i, "Reeder ya pastor dang masü saka tembar tajung ka, tesayur ka aser Tsüngrem metetba aser tatishitsü sayur lenir ka liasü. Harry ajanga tebur-tetsür aika taküm nung kongshio. Kenü anogo ni pa tanaben ajurutsü ta ni amanger. Ann künati tang ama mangyimba mapang nung par kibong atema sarasademtsür," ta lemsatsep. Southern Baptist Theological Seminary nung Tir, Albert Mohler-i twitter ajanga, "Kü tembar aser Birmingham nung aliba Briarwood PCA nung pastor, Harry Reeder asüba osang angashia jashir. Harry ya tamang lenir ka aser taochi aketba nisung ka liasü. Ni pa kinüngtsü aser par kibong den pai meimba Arogo atema sarasademtsür," ta lemsatsep. Briarwood Arogo tentetsang, Rev. Frank Barker 1999 küm pastor nungi anisüngzükbä sülen nungi Reeder tongti pastor inyaka liasü. Pa Chattanooga, Tennessee area nung aliba Independent Bible Church nunga pastor inyak aser Miami, Florida nung aliba Pinelands Presbyterian Church nunga pastor inyaka liasü. 1983 küm pai North Carolina nung Christ Covenant Presbyterian Church tenzüka liasü. Reeder-i pa kinüngtsü Cindy den tanur asem aser semchir aika toktsür pilaogo.

ANOGO ABEN TSÜNGREM DEN

Tanela tanebtsü (T.ken 105:1-4)

Temang anema alitsü asoshi anogo shia chiyongtsü tatakzük vitamin aliba chiyongtsütem achitsü doctori ashir. Kasaji asenok tanelaren anema alitsü asoshi anogo shia Tsüngrem nüngdakba Dawidi ashir. Mezüngbuba nüngdakji tenüng asangba. "O Kibuba dang tepela sayuang, aser Pa tenüng nung jajaang... Pa sayatenya mapa ajak indang shiang" (t.1,2). Pa tushiba tetezü Tsüngremi inyakba mapa ajak asoshi Pa tenüng asangba aser Pai asenok den lemsaba ajak asoshi. Tushiba tetezü Kibuba tsüngdang pelatepba kechiaser asenok Pa chirtem lir. Sarasadem. "Pa tenüng nung jajaang" (t.1). Kodang asenok tashi, taochi aser teyari nungdaker asenoki Kibuba dang ajar. Aser Pai teti asenok dang angashir. Kuli asübajia tongtipang. "O Kibuba dang tepela sayuang. Nübur rongnung Pa mapatem metetdakang..." (t.1,2,3). Asenok tetushidang tushir aser sarasadem dang sür tangar dang Kibuba indang melemsatepra, asenok temesü, teladak aser pei atema bilemba taküm ka dang akümtsü. Tangar dang asenoki Paji dang Kümtetdakba lir ta asenoki ashitsü nüngdak. Tatembangbuba taginübaji Pa jak bushitsüba. "Nenoki Kibuba aser Pa tashi bushiang; maneni Pa tejak bushiang" (t.4). O ka nung, Kibuba tejak tesangwa nung liang. Kibubai ne taküm nung menüremlokja liang aser Pa dang peladaksütsü bushiang. Ne temang anema alitsü anebalutsü nüngdakba ama, tanelarena anema alitsü nüngdak. Nai ne tanela timi anebaludar ma? Tsüngremi anogo shia aginüba jagi ne tanela anema aliba nung yaritsü. Anogo shia ne nüngdak tajemtiba metetta liang. Iba jagi Pa pelatsü aser Pa dangi sentsüwangshi bener arutsütsü.

Arogo lenirtemi G7 lenirtem dang nuclear hadir nokdangtsü mepishi

**May 21, 2023:** US nung Nagasaki nung atomic bomb ka Khristan putir ana aser Japan pokdaksüba lendong nung nisung nung Khristan putir anati külem 74,000 shi asü. shidi ka ajanga Group of Seven Atomic bomb lendong nungi (G7) linüktem nungi lenirtem kümzükyonga nisung aika dang nuclear hadir amshiba temang nung timtem balala meshimeshia nokdangtsü atema adoka liasü. telemtetba agidaktsüner, ta mepishi. "Item Arogotem nung lenirtem ama, nuclear hadir nung sen teimba indokbaji United States (Santa Fe, NM) lir, nuclear hadir teimba yua aliba tesemji United States (Seattle, WA) lir aser atomic bomb ajanga takoksa tamajungba anguba Arogo anaji onok (Hiroshima aser Nagasaki, Japan) lir, anungji onoki iba anema jembitsüsa akümer," ta Khristan putirtemi metetdaksü. Iba dak alia putirtemi Japan Ato kilonser, Fumio Kishida-i G7 senden amentsü atema Hiroshima yimti shimba atema pa nem tenüngsang agütsü. Japan Ato kilonser, Fumio Kishida ya Hiroshima yimti nungi lir. Amongnü (May 21) G7 lenirtemi Hiroshima Peace Memorial semdanga akhidang atomic bomb lendong nung asürtem nem akhüm agüja liasü. Khristan putirtemisa New Strategic Arms Reduction Treaty atema US aser Russia nati asentenshir ken o jembi tenzüksüla, ta mepishi.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Puzük**

(v) Meteta adok, teka agi pur alu ( detected, caught)

\* Sepaitemi telongpur aliba puzük aser orr **puzüka** bener ao.

**Puzükpuzüker**

(adj) sentsü lirepa matsük ( dull color)

\*Sü anü nung kanga apuba agi **puzükpuzüka** aküm.

**OLONG PAITEP # 6522**

1			2		3		4		5
6		7							
				8					
9				10					
					11				
			12						13
	14							15	
					16				
			17						
								18	
19									

**TIPIEN**

- 2. Teburtemi tejak nung awaba - (8)
- 6. T \_ \_ \_ em - (3)
- 8. Tzük ayudak - (3)
- 9. Nungdakba dang timba - (6)
- 11. Züina ao - (4)
- 12. Yangi tzü angur - (5)
- 14. Tangar dang nungi tali - (4)
- 16. Senyong masü - (6)
- 17. Oadokdi - (3)
- 18. Tzü tarok - (3)
- 19. Yimtaklir aikati iba ya ki den külemi yanglusemer - (8)

**LANGTSÜNGLEN**

- 1. Temejangdak - (6)
- 3. Nisung ka mapa inyaksü nubo - (4)
- 4. Azüntsü asoshi mejemba - (6)
- 5. Tesangwa agütsüba - (5)
- 7. Tila masü - (4)
- 10. Tebenjem tetsür chanu - (4)
- 11. Tekolak nung inok - (4)
- 12. Tetsüngda - (6)
- 13. Tangar inyakba ka inyak - (6)
- 14. Tim masü ta ashi - (5)
- 15. Asalendong - (4)
- 16. Tanü dangtsü - (4)

**OLONG PAITEP # 6521 TELANGZÜBA**

**TIPIEN :**

- 1. Telok, 4. Aluru, 6. Ozüng,
- 8. Emk, 9. Kin, 10. Teti, 12. Süir,
- 13. Jen, 14. Ola, 16. Talak,
- 17. Mazük.

**LANGTSÜNGLEN :**

- 1. Tenükjang, 2. Luden,
- 3. Kioktsü, 5. Lenti,
- 7. Tajangzük, 11. Teronem,
- 12. Sempa, 13. Jahaz.



**TECHNOLOGY TASEN :**

Warakla tanur asotsü hospital nung admit sür külen doctorbai Alokba o tebutüsü na dang technology tasen atema rasaa ashir.

**Doctor** : Tanü asüng joko science ya onsara karaa ainerji kinüngtsü nosotsü khangshidang ya kinungpu den "pain" atubaji lemsatepa abentsüa machine lirkoti, koma pilemer?

**Alokba** : Kanga jungerto, painji lemsatepa bendi. Warakla Joko pain aru tenzük dangji machine ajangaji Alokba dangi 5% transfer asü, Saka Alokba to kecha effect mali, 20%, 50% aser tatemsa 100% transfer asü dangji Alokba to ken tena kazüyar, Warakla toagi tanur tajung ka aso.

Ajak ratateper, machine jiang aitsüteper senshi. Kodang Alokba o Warakla na baby ji bener kidangi aru, par kimaji Postman ba longdaka sür liasü.

~ Lilir : WhatsApp

**Shillong nung British nung alidang yangluba school ka rongdok**



Deobarnü Meghalaya chief minister Conrad Sangma-i Shillong nung Khasi Jaintia Presbyterian Girls Higher Secondary school rongdokba tesem semdangba angur.

**Shillong, May 21, 2023**

**(Agencies):** Deobarnep Shillong nung Khasi Jaintia Presbyterian Girls Higher Secondary school rongdok aser tanü Meghalaya chief minister Conrad Sangma-i tesem tonga oa reprangdangogo.

Khasi Jaintia Presbyterian Girls Higher Secondary school ya British nung alidang yangluba ki ka liasü aser tanep mitsü kuma rongdokogo.

"Shillong nung Khasi Jaintia Presbyterian Girls' Hr. Sec. School rongdokba angundang temulung raksar. School yanglutsü atema Chief Minister's Special Development Fund nungi

Rs 1 crore teyari agütsütsü" ta CM Conrad Sangma-i ashi.

Paisa school nung kaketshirtem aser iba temeket alirtem den ajurutepa sensaksema liasü.

"Iba lendong nung nisung yiruyibong masüba atema pelar" ta Conrad-i ashi.

Iba school yagi lokti den kanga junga sendaktepa lir aser küm 130 tema aruogo. School ki rongdokba ya nübertem indang takoksa lir ta paisa shisem.

School indang hostel nung alirtem kümzük aser parnok Mission Compound nung aliba community hall nung jenoka lir

ta ktdangsurtemi ashi.

Küm noklang ka tejakdang Northeast nung tetsürtem school ji iba ya dang liasü. 2017 nung KJP Girls' Higher Secondary School indang küm 125 ajungba benjung monga liasü.

Welsh missionary temi Sohra (taoba Cherrapunjee) kübok Nongsawlia yimtsüng nung mezüngbuba school lapok aser iba nungi KJP Girls' Higher Secondary School ya razüka aoba liasü.

Welsh Presbyterian Mission Society-i school ktdangsurtsü tenzükba sülen 1892 nungi iba school ya tetsürtem indang dang aküm.

**MLA Akhil Gogoi-i Guwahati nung section 144 agientsü akhanger**

**Guwahati, May 21, 2023**

**(Agencies):** Assam sorkari Guwahati nung section 144 ozüng agütsüba aitsür aser iba ya agientsüla ta Assam MLA Akhil Gogoi-i ashi.

"Sorkari iba lemtetba agiba aitsür, iba ya ozüngi memelar aser state o linük nung democracy tensa ayutsüla" ta Akhil Gogoi-i ashi.

Sivasagar nung nisung kar jaoker küm ka lungkak maitsü bond ka nung sign südaksüba atema tebilemtsü abener, ta pai ashi.

Iba tatalokba atema sasaa bilemer kechiyong iba ya ozüngi memelar aser tashiyim mapa ka lir. Chief Minister Himanta Biswa Sarma-i ozüng alema inyaksangshiba aitsür, ta Akhil-i ashi.

"Sorkari tarutsü nung ibala mapa meinyaksü aser tangsa section 144 agientsü akhanger" ta paisa metetdaksü.

Sorkari kanga dang ajungbena section 144 ozüng benokba ya nübertem temeten alenbanga ayutsü atema lir. Sorkari democracy anema inyaksangshir

ta Akhil-isa aitsü.

"Chief Minister Himanta Biswa Sarma-i taoba mapang Assam nung tensa süngjema lir ta shiogo, süra kechiba section 144 benoker. Assam nung lungkak aitba sentongtem, rally aser nisungtem adenshiba noktangba atema tebilemtsü abener" ta Akhil-isa shisem.

Guwahati police-i yimti nung tensa azioka ayutsü atema section 144 CrPC ozüng benokogo. Iba tetuyuba ajanga Guwahati nung nisung pungu tema adenshitsü memelar.

**Assam sorkar ktdangsurtem Minakshi Kalita tepuokdak ayur**



**Guwahati, May 21, 2023**

**(Agencies):** Directorate of Vigilance and Anti-Corruption, Assam-i tax ktdangsur Minakshi Kakati Kalita'er kidang

nungi sen aika ngutetba sülen anogo ananü lir la tepuokdak ayugo.

May 18 nü Kalita-i süpokrem meshia agidang Vigilance and

Anti-Corruption ktdangsurtemi apu.

Kasa anogo parnoki lar ki mita reprangdang Rs.65,37,500 apu.

Asstt. Commissioner of State Tax Minakshi Kakati Kalita'er kidang Rs. 65,37,500 ngutetogo aser maneni bushisüngdang südar ta ktdangsurtemi metetdakja liasü.

Minakshi Kakati Kalita-i GST online functions lapoktsütsü atema Rs 10,000 meshir aser lai Rs. 8,000 agitsü mulunga lir ta Directorate of Vigilance and Anti-Corruption tsüngdang ken o ka benok.

Iba osang nung ajemdaker ktdangsurtemi Assistant Commissioner Minakshi aputsü atema tasa ka atong. Lai süpokrem sen meshia agidang apu.

DIR VAC-i Minakshi Kakati Kalita anema Prevention of Corruption Act, 1988 indang ken o ka benoka liasü.



## Menungraa Bilemteter

Anungla T. Imsong

Nai onok toktsür küm ana (2years) süiogo, saka anogo shia onok azüngmeyaka na lungra-a bilemdang, nü temeim, nü shisataka, nü teyari aser nai temeim mapa tajung aika inyakbatem bilemteta onok mulung anisüngzüker.

Nai toktsüba temeim kinungertem tanü maneni na lungraa sarasadema amonger.

~ Temeim kinungertem

## G7-i China den tesendaktep tajung aginer

**Hiroshima, Monupii/May 21 (Agencies):** Group of Seven (G7) ajanga China dang tajunglen tesendaktep alitsü ayongzüker aser parnoki linük terenlok nokdangtsü bushir masü ta nenshia ashi saka Beijing-i meimchir temeden aser litsü-lika nung tashiyim amshiba aija liasü.

Honibarnü G7 lenirtemi sangdong ka agütsüba nung tzü-mopung melenba amala tesem tem nung China nungi amalitep akatsü ayongzüker saka yimtenren tsütsü par tamendak dak aija liasü.

Taka-tait democracy linüktem nungi lenirtemi China den tepila adoktsü tebilemba mali ta ashi saka rongsenketzüng tsütsü tashi ita nokdaksü atema atsü-anem akatsü nüngdaker, ta ashi.

"Ozü sentong ya China yirutsütsü sa renemba masü

mesüra China indang rongsenketzüng tetsü terenlok aser development nokdangtsü meranger masü," ta G7 lenirtemi ashi.

"Alima ozüng nung ama China-i shilem agira ibaji alima asoshi tajung asütsü."

Saka Canada, France, Germany, Italy, Japan, United Kingdom aser United States linüktemi tentetba G7 ajanga China-i bener aruba "non-market policy" aser yimyatem ajanga timtem agütsüba nung telangzüba agütsütsü, tim masüba mapa inyakba langzüksü aser rongsenketzüng tsütsü tashiyim amshiba koktettsüsa nokdaksü, ta ashi.

Beijing-i East aser South China Seas nung kibur akumba aser ano Hong Kong, Tibet aser Xinjiang nung nübur temeden anema inyakba

asoshi G7-isa khuret lemsatepa liasü.

G7 lenirtemisa China dang Ukraine nung rara anentsü asoshi Russia ajungshitsü aser Taiwan dak sendakba nung tajunglen nungi pangzüng renemtsü ayongzüker, koba Beijing-i mailnald China den tanaben ka akumtsü asoshi nüngdakra tashiyim amshitsü amokmeren o jembia lir.

Honibar menur China indang foreign ministry ajanga iba sangdong ya magizük aser par litsü telungzüker nung teka amoshiba tatishitsü ka lir ta ashi aser G7 senden ayonger Japan nem dang ashishiogo ta ashi.

Hiroshima, Japan nung asemnü mena Deobarnü tembangba senden nung Russia-i Ukraine nung raraba aser China tashi ulua akumba indang tali jembia liasü.

Office of the  
**MOLUNGKIMONG VILLAGE COUNCIL**  
Mejensanger Putu Menden  
Dist. Mokokchung, Nagaland. P.O Tuli 798618

**SANGDONGER**

Mr. Akangnungba-i züluba kaket 'Supongmeren Path Finder for Godhula and E.W Clark' Chapter 1 page 2 nung zülua aliba aitoker (delete) ta koba paper nung pai sangdonga ali, iba atema pa dang Mejensanger Putu-i senchi Rs. 100 (one hundred) achir.

Tanü nungi tenzüka Molungkimong yimcha yimkum otsü kin shingaia putu dang masüngdangi zülutsü memelar, kar-i danga aibelenra putu-i tapet mera agitsü sangdonger.

Sd/-  
(Y. IMSU TZUDIR)  
Chairman  
Molungkimong Village Council

(ICHUBA TZUDIR)  
Secretary  
Molungkimong Village Council

Secretary  
Village Cour cil  
Molungkimong

**ANGO CHANU AYOKER**

Kolkata indang ango chanu (fingerlings) tapu balala den Magor May 22 nungi Kohima Road anasa Aolijen sector, Ungma nung angutsü; talinertemi tsünglanglen agüja aliba Contact No. nung tongtepratepsü akok.

K. Lanu Lkr  
8787650064 / 9862747886

## Sudan army aser RSF tsüngda anogo tenet ceasefire zülutepogo

**Khartoum, Monupii/May 21 (Agencies):** Saudi Arabia linük kübok Jeddah yimti nung jembishinüa aruba sülen Sudan nung raratepa aliba telok ana tsüngda anogo tenet ceasefire alitsü molungtepogo, ta Washington aser Riyadh nungi sangdong ajanga ashi. Iba rara tenzüker hopta troki ayaoka aidang nisung noklang aika taküm samaogo aser million ka dak tema tesem balala nung prokshia lir.

Iba ceasefire tezüngzüktep ya Honibarnü menur zülutepa liasü.

Iba ceasefire ya Hombar aonung 9:45 ako nungi tenzüksü, ta yimjung ken o animesor jembir United States aser Saudi Arabia külemi sangdong ka agütsüba nung shi alir.

Taoba mapang ceasefire züngzüktepaka yangji alimba ama meinyaki liasü. Ajisüaka tang züngzüktepba ya US-Saudi aser international-supported monitoring mechanism ajanga mapa kuma inyaksü, ta sangdong ajanga ashi.

Iba tezüngzüktep nung teyari osettem lema agütsütsü, tongtipang services tem akhi ama agütsütsü aser mozüki aser tongtipang tesemtem nungi sepaitem ainshitsü shia lir.

"Prangbong ola anena tetsükdaksü makai meimchir nüngdakba mapa inyaksü mapang süyir. Telok ana prong dang iba tezüngzüktep nung aliba ama inyaksü ayongzüker - alimai repranga lir," ta US Secretary of State, Antony Blinken-i ashi.

Sudan army aser paramilitary Rapid Support Forces (RSF) tsüngta raraba ajanga linük teraksa tia nung lir. Chiyongtsü, sen aser nüngdakba osettem kanga kera ajema akumer aser bank, embassy, aid warehouses aser

tekülem kidanga nisung telok-telok arua rakzükrakterem.

Sudan yimtiba Khartoum tekolaklen Nile ayong meketa aliba Omdurman aser Khartoum North nung alirtemi tayimtsü amshia amaker ta ashiba mapang ka nung iba ceasefire ya tenzüker.

Omdurman nung state broadcaster anasa amakba lir, ta tenük kuli akartermi ashi.

"Tanep artillery tulu amshia amak aser ki ajunga anakshitsü," ta Omdurman kübok al-Salha kiyong nung alir kati osangbener dang ashi.

RSF züngsemtem ya civilian aliba tesemtem nung meyoktepa lir, anungji army temi tanen makai tayimtsü amshia amaker.

Tesem kar nung prangbong ola angashir, saka tensa tajungba lir, ta Khartoum nung alir kari ashi.

Iba rara ya April 15 nung tenzüker aser nisung 705 takum samaogo aser 5,287 shi yiruogo, ta World Health Organization ajanga ashir. Nisung million 1.1 shi linük telongzüker aser kidanger linüktem nung jenoka lir.

Darfur region kübok Nyala aser Zalenjei yimtittem nung ali nung raraba ano tang tesashiba kumogo.

Nyala yimti nung rara tesashiba akumba atema telok anaprong nungi Hokulbarnü sangdong agütsüdang kati ka tenüng sena liasü.

1989 küm mitkar tashi amshia sorkar atsüngdoker taoba tir Omar al-Bashir ya pa sasa tir akum aser küm aika mangatetep adoka yimsüsü aruba sülen Sudan ya democracy dangi melentsü asoshi linük balalai yaria ken o jembiba kübok RSF ya army nung züngsem kumdaksütsü sentong yanglubu nung mangatetep adoka rara ya tenzüker.



May 21, 2023 : Azüdokshi anema Belgrade, Serbia nung nüburtem yimtung süa jajaba noksa nung angur. Ita tetenzüklen iba linük nung 'mass shooting' lendong anaben ataloker sorkari junga ketdang mesütetba mechi nisung meyerijang aika linük yimtiba nung adenshia yimtung süa jaja liasü.

# Inter-district asayamung atema Jersey sayaogo



**Dimapur, Monupii/May 21 (TYO):** Inter-district Senior men's cricket Tournament atema jersey sayaba sentong May 21 nü Nagaland Cricket Stadium nung agiogo.

Iba sentong nung district team tem nungi asayar, coach aser manager tem, asayamung committee züngsemtem aser Nagaland Cricket Association nungi ketdangsürtemi shilem agia liasü.

Inter-district Senior men's tournament ya May 22 nü

tenzüksü aser May 29 nü tashi asayatsü.

Iba asayamung ya Nagaland Cricket Stadium aser Sovima Cricket Ground ta tesem ana nung asayatsü.

Asayamung nung asayatem Nagaland Cricket Association YouTube channel ajanga sayutsü aser live score tem CricHeroes App nung update sütsütsü.

Mezüngbuba anogo Dimapur aser Zunheboto na Nagaland Cricket Stadium nung

aser Niuland o Kiphire na Sovima Cricket ground nung anepdang 8:00 ako nungi tenzüka asayatsü.

Iba sülen Wokha aser Kohima na Nagaland Cricket Stadium nung aser Chumoukedima o Tuensang na Sovima Cricket Ground nung 12:30 ako nungi tenzüka asayatsü. Nagaland Cricket Association-i cricket asaya meimertem ajak dang asayamung nung asayatem arua repringtsü asoshi ayongzüko.

## Elena Rybakina-i Italian Open kokogo



**Monupii/May 21, 2023**

**(Agencies):** Honibarnü Italian Open tetsür kija asaya final Elena Rybakina-i kokogo aser la tang Roland Garros dak rangloker lir.

Kazakhstan tsür Rybakina-i, Foro Italico nung taküm WTA 1000 title tanabuba benogo. Final asaya nung Anhelina Kalinina tebi yiruba ajanga asaya tembanga masayatetsüsa aküm.

World number six asayar Rybakina shiba reigning Wimbledon champion lir lai final asaya ya 6-4, 1-0 agi koka aliba mapang Kalinina masayatetsüsa aküm.

Arishi küm 23 tain Rybakina ya tetsürtem rongnung taküm WTA 1000 titles anabuba abenba mezüngbuba asayar kümogo. Lai March ita Indian Wells asayamung koker liasü.

Maneni la taküm Australian Open aser Miami nunga runner-up liasü aser tang French Open dak rangloker lir.

"French Open nunga junga asayatetsü imla atar. Ni iba tesem nung jangradema asaya

arudar," ta lai ashi.

"Ni clay nung asaya aika nung asaya arudar aser clay nung asayatsü tera temelaba kümogo aser tali temlung lemteta kümdaktsür.

"Anema alitsü aser physically renema alitsü kanga tongtibang aser asayamung nung takok angutsü imla atatsüla," ta laisa shisem.

Iba asayamung akokba sülen Roland Garros masaya tsüngda Rybakina ranking nung jenjang pezübubai atutsü. La ya season ka nung Australian Open, Indian Wells, Miami aser Rome nung final tonga asayaba tetsür asayatem rongnung tasembula lir.

Taoba mapang Monica Seles-i 1991 küm aser Maria Sharapova-i 2012 küm item asayamungtem final tonga asayaogo.

Rybakina-i taküm asaya 28 kokogo aser la dang nungi world number two aser Australian Open champion Aryna Sabalenka-i dang asaya timba koka lir. Lai tang tashi nung asaya 29 koka lir.

## El Salvador nung stadium ka nung nisung 10 dak tema ajemset



**Monupii/May 21, 2023**

**(Agencies):** El Salvador nung stadium ka nung local asayamung ka repringtsü asoshi nüburtem adenshiba mapang mepetmesü adoka nisung 12 tashi süogo, ta police aser sorkar ketdangsürtemi metetdaksü.

"Nisung 12 asüba osang angazükogo. Nisung 9 stadium nung aser mozüki balala nung nisung asem asüba osang angazükogo," ta National Civil Police (PNC) Director Mauricio Arriaza-i Deobarnü osangbenertem dang ashi.

"Salvadoran soccer mang ayimba mapang ka lir," ta Arriaza-i ashi.

Police-i ashiba agi, linük yimtiba San Salvador nung FC Alianza aser Club Deportivo FAS na asaya repringtsü asoshi fan tem stadium-i aitsü

merangba mapang iba lendong ataloka liasü.

"Stadium ajunga nung kishi ana dang lapoker liasü," ta fan kati La Prensa Grafica dang ashi. "Kima nung aliba nüburtemi tashiyim agi ground telungi aitsü merang aser parnok onok tema nung tsüka liasü."

Fan-sa Sandra Argueta-i ashiba agi, iba ajanga tanur aser tantsü tamburtem nem kanga timtem agütsü aser ibayongji kishi ajempoktsüsa aküm kechiyong iba tesem nung nisung aika liasü aser onok tangula mesapoina liasü.

El Salvador indang Interior Minister Juan Carlos Bidegain-i ashiba agi, civil protection service indang first responder tem iba tesem nung liasü aser parnoki yirur alirtem anepalua liasü.

Iba asaya ya masayatsüsa aküm aser emergency personnel temi nüburtem stadium nungi anin, kong police officers aser sepaitem aika adenshir liasü.

Kasa mapang nung FIFA tekolakba-i Deobarnü asükhu lemsatepogo.

"El Salvador nung tiamaka lendong atalokba nung taküm samara kinunger aser medemertem den asükhu lemsateper," ta FIFA tir Gianni Infantino-i ashi.

Twitter nung sangdong ka ajanga Salvadoran Football Federation-ia, Cuscatlan Stadium nung lendong atalokba atema kanga sasa bilemba lemsatepogo.

Health Minister Francisco Alabi-i ashiba agi, linük indang hospital network-i yirur alirtem nem teyari agütsüdar.

## BILEMDANGANG

"Pei maitüsü sentoka toktsür tangar jilu tebenshi."